

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj: 7/10), razmatrajući Informaciju o opravdanosti osnivanja Javnog servisa Kantonalna radio-televizija, Vlada Zeničko-dobojskog kantona, na nastavku 87. sjednice, održanom 21.11.2012. godine, d o n o s i

ZAKLJUČAK

I

Zadužuje se Interdisciplinarna radna grupa za izradu Informacije o opravdanosti osnivanja Javnog servisa Kantonalna radio-televizija, da dostavi Vladi Zeničko-dobojskog kantona kraću informaciju koja će sadržavati podatke o modalitetu formiranja i načinu funkcionisanja internih televizija u BiH i sličnih televizija u zemljama u okruženju.

II

Zaključak stupa na snagu danom donošenja.

Broj: 02-_____ /12.

Datum, 21.11.2012. godine

Z e n i c a

PREMIJER

mr.sci.Fikret Plevljak dipl.ing.

DOSTAVLJENO:

1x Interdisciplinarna radna grupa
(putem Esada Delibašića),

1x a/a.

**Bosna i Hercegovina
Federacija Bosne i Hercegovine
Zeničko-dobojski kanton
Interdisciplinarna radna grupa za izradu Informacije
o opravdanosti osnivanja Javnog servisa-Kantonalna televizija**

***Informacija o opravdanosti osnivanja
Javnog servisa Kantonalna radio-televizija***

Zenica, novembar 2012. godine

SADRŽAJ

Uvod.....	3
1. Kantonalne radio-televizije u Federaciji BiH	
<i>1.1. Televizija Sarajevo.....</i>	<i>4</i>
<i>1.2. Radio-televizija Unsko-sanskog kantona.....</i>	<i>5</i>
<i>1.3. Radio-televizija Tuzlanskog kantona.....</i>	<i>5</i>
<i>1.4. Radio-televizija Bosansko-podrinjskog kantona.....</i>	<i>5</i>
2. Postojeća medijska struktura na području Zeničko-dobojskog kantona.....	6
3. Analiza pravnih propisa.....	7
4. Mogući koncepti formiranja Javnog servisa kantonalna radio-televizija.....	10
<i>4.1. Formiranje novog, samostalnog i posebnog pravnog lica - Javnog servisa (kupovina opreme, izgradnja zgrade, zapošljavanje potrebnog kadra itd.)..</i>	<i>10</i>
<i>4.2. Formiranje Javnog servisa kao pravnog lica - putem integracije postojećih općinskih rtv stanica (općinske stanice gube svojstvo pravnog lica).....</i>	<i>11</i>
<i>4.3. Transformacija RTV Zenica u Kantonalnu radio-televiziju.....</i>	<i>11</i>
<i>4.4. Koncept djelimične stručno-tehničke integracije postojećih rtv sistema u kantonalni informativni sistem, uz zadržavanje pravnog subjektiviteta članica.....</i>	<i>12</i>
5. Osnove programa Javnog servisa Kantonalna radio-televizija.....	14
Zaključci.....	15

Uvod

Procesi demokratizacije i tranzicije društva na području Federacije Bosne i Hercegovine i Zeničko-dobojskog kantona nalažu potrebu osiguranja prava građana na objektivno i profesionalno informiranje o događajima od opšteg interesa. S ciljem zadovoljavanja te potrebe u ovoj informaciji se razmatraju mogućnosti formiranja Javnog servisa Kantonalna radio-televizija. S tim u vezi napominjemo da inicijativa o formiranju Kantonalne radio-televizije u Zeničko-dobojskom kantonu postoji od perioda formiranja Kantona.

Zeničko-dobojski kanton čine 12 općina koje se nalaze na komunikacijski raznolikom geografskom prostoru. Naime, u razmatranju inicijative za formiranje Javnog servisa Kantonalne radio-televizije u Zeničko-dobojskom kantonu ne možemo zanemariti geografski položaj Kantona. Formiranjem Javnog servisa, na postojećim tehničkim konceptima (predajno-prijemni sistem), bi s obzirom na činjenicu o teritorijalnoj razduženosti općina (posebno općina na rubnim područjima Kantona -Usora, Tešanj, Doboj Jug, Olovo, Breza, Visoko i Vareš), osnovni cilj, informiranja građana na području cijelog Kantona učinilo irelevantnim.

Osnivanje Javnog servisa Kantonalna radio-televizija projekat je koji mora počivati na principima profesionalnog, objektivnog, informativnog i pluralističkog medija. Javni servis bi trebao biti medij koji će pomoći informiranju javnosti i koji će pravovremeno reagirati na privredne, ekonomske i druge društvene probleme, te koji će funkcionalno povezati komunikacijske punktove u horizontalnom (općine-Kanton) i u vertikalnom smislu (recipijent-općine-Kanton-Federacija BiH-međunarodni medijski prostor). Kantonalni radio-televizijski servis bi trebao raditi na educiranju i formiranju kritičkog javnog mnijenja, te bi uz druge društvene faktore trebao inicirati rješavanje akutnih društvenih protivrječnosti.

Osnivanjem Javnog servisa Kantonalna radio-televizija stvara se bitna pretpostavka za kreiranje pluralističkog, otvorenog i demokratskog sistema masovnog komuniciranja, čime se:

- a) povećava stepen informiranosti javnosti o političkim, privrednim, zdravstvenim, kulturnim, obrazovnim, naučnim, religijskim, ekološkim, sportskim i drugim događajima na području Zeničko-dobojskog kantona;
- b) afirmiše vrijednosti bosanskohercegovačkog društva;
- c) pomaže formiranju univerzalno-humanističkog sistema vrijednosti;
- d) pomaže proces formiranja javnog mnijenja;
- e) trajno, istinito, cjelovito, nepristrasno i pravovremeno informiše javnost o događajima i pojavama od javnog interesa u općinama, Kantonu, zemlji i inostranstvu;
- f) politička, privredna, socijalna, zdravstvena, kulturna, obrazovna, naučna, ekološka i druga pitanja tretiraju nepristrasno, omogućavajući ravnopravno sučeljavanje različitih stajališta.
- g) doprinosi poštovanju osnovnih ljudskih prava i sloboda, demokratskih vrijednosti, te unapređenju javnog dijaloga;
- h) praćenje informativnog, kulturnog, obrazovnog i zabavnog programa prilagođava potrebama lica oštećenog sluha i drugih lica sa posebnim potrebama;
- i) poštuje privatnost, dostojanstvo, ugled i čast građana, a posebno djece i omladine;

j) njeguju opšteprihvaćena društvena mjerila.

Razlozi za formiranjem Javnog servisa Kantonalna radio-televizija proizilaze iz stvarne potrebe za kontinuiranim informisanjem građana Zeničko-dobojskog kantona o svim segmentima života i rada, a posebno o radu kantonalnih ustanova i institucija. Formiranjem Kantonalne radio-televizije učinilo bi se mnogo na kreiranju općih prilika života u Kantonu, naročito u oblasti informativno-političkog, obrazovnog, kulturnog i sportskog programa, a što bi rezultiralo potpunom informiranosti građana o dešavanjima na cijelom području Kantona. Plasiranje-emitiranje informacija od velike je važnosti za stanovnike Zeničko-dobojskog kantona i učinilo bi ga informativno jedinstvenom i kompatibilnom teritorijalnom jedinicom. Prilagođavanjem programskih sadržaja, kao što su hronike ili tematske emisije o programskim ciljevima i aktuelnim projektima, pa i zakonodavne i izvršne kantonalne vlasti, povećala bi se informiranost građana o općim tokovima u Zeničko-dobojskom kantonu, te bi im se približio rad ne samo kantonalnog nivoa, nego i općinskog, pa čak u nekom obliku i nivoa mjesnih zajednica.

Javni servis Kantonalna radio-televizija će nepristrasno i objektivno informisati građane o događajima i pojavama od javnog interesa u općinama, Kantonu, zemlji i inostranstvu. Javni servis će poštovati i podsticati pluralizam političkih, religijskih i drugih ideja, te omogućiti javnosti da bude upoznata sa tim idejama. Projekat formiranja RTV, čiji program bi se emitirao na području cijelog Zeničko-dobojskog kantona, je društveno opravdan jer bi se medijski približile i komunikacijski povezale sve općine na području Kantona.

1. Kantonalne radio-televizije u Federaciji BiH

Na području Federacije Bosne i Hercegovine egzistiraju četiri kantonalne RTV stanice: Televizija Sarajevo (Kanton Sarajevo), RTV Unsko-sanskog kantona, RTV Tuzlanskog kantona i RTV Bosansko-podrinjskog kantona. Ovakvi RTV sistemi opravdavaju razloge svog formiranja, jer svojim signalom pokrivaju područje na kome se nalazi većina populacije tih kantona, te zadovoljavaju potrebe stanovništva za informacijama iz domena javnog servisa.

1.1. Televizija Sarajevo

TV Sarajevo je regionalna javna televizija u službi javnog interesa građana Kantona Sarajevo. Osnivač TVSA je Skupština Kantona Sarajevo i u najvećem procentu finansira se iz Budžeta Kantona. TVSA nema vlastiti poslovni prostor, a upošljava 125 radnika. Signalom pokriva šire područje KS-a, a programsku saradnju i razmjenu ostvaruje sa drugim regionalnim javnim televizijama, te tako svoje emisije plasira širom BiH. U okviru programske politike preferira program domaće produkcije, a značajnu pažnju poklanja programskim sadržajima za djecu i mlade. TVSA je autentičan glas Kantona Sarajevo u Bosni i Hercegovini i u svijetu i ima obavezu promovirati historijske i aktuelne nacionalne, kulturološke i religijske, privredne, regionalne i druge pozitivno vrednovane osobnosti Sarajeva i BiH. TVSA svoj razvoj dimenzionira na pokrivanju šireg područja Kantona Sarajevo u terestrijalnoj mreži, uvezivanjem sa ostalim javnim televizijama na regionalnom nivou i emitiranje satelitskog signala za dijasporu. Iz Budžeta Kantona Sarajevo u 2012. godinu, TVSA će biti doznačena subvencija u iznosu od 3.390.000,00 KM i grant za nabavku programa u iznosu od 400.000,00 KM, a grant za nabavku opreme nije planiran u Budžetu Kantona za 2012. godinu. Iz sredstava subvencije, JP TVSA finansira sljedeće

troškove poslovanja: plaće uposlenih, naknade troškova zaposlenih-topli obrok, prijevoz, regres, zakupnine i najamnine, obaveze prema Regulatornoj agenciji za komunikacije (RAK), autorska prava, naknade zakonskih organa i tijela preduzeća (Skupština, Nadzorni odbor, Odbor za reviziju, Odjel za internu reviziju), dio tekućih troškova poslovanja (održavanje TV opreme, rezervni dijelovi i sitni inventar, komunalne usluge i sl.). Iz granta za nabavku programa se finansira: nabavka gotovog programa, dio naknada autorima i spoljnim saradnicima (vlastita produkcija i koprodukcija). Ostali tekući troškovi poslovanja finansirani su isključivo iz vlastitih sredstava i to: putni troškovi, reprezentacija, osiguranje, nabavka dijela opreme, utrošene sirovine, poštanske i telekomunikacijske usluge i ostali troškovi poslovanja.

1.2. Radio-televizija Unsko-sanskog kantona

JP RTV Unsko-sanskog kantona je osnovana 22.12.1995. godine i smještena je u Općinskom kulturnom centru, za što plaća zakup. Upošljava 66 radnika i svakodnevno emitira preko 16 sati televizijskog i 24 sata radijskog programa sa preko 50 posto programa u vlastitoj produkciji. U Budžetu USK za RTV je planirano 800.000,00 KM. Navedeni iznos nije dovoljan ni za isplatu ličnih dohodaka uposlenim. RTV USK od marketinških usluga na godišnjem nivou ostvaruje 650.000,00 KM. Signalom pokriva prostor osam općina USK (Bihać, Cazin, Velika Kladuša, Bužim, Bosanska Krupa, Bosanski Petrovac, Ključ i Sanski Most) kao i dijelove RS-a (Bosanski Novi, Prijedor, Bosanska Kostajnica...). Već godinu dana program TV USK-a je u paketu „Moja TV“ BH Telekoma. U domenu tehničkih pretpostavki RTV USK raspolaže kvalitetnom vlastitom opremom koja se bazira na digitalnom video zapisu i digitalnoj montaži, slici visoke rezolucije i kvalitetnoj postprodukciji.

1.3. Radio-televizija Tuzlanskog kantona

Radio-televizija Tuzlanskog kantona osnovana je početkom 1993. godine. U početku je djelovala u skromnim tehničkim uvjetima i sa skromnom programskom šemom. Profesionalan rad je rezultirao proglašavanjem najboljom televizijom u BiH nekoliko godina zaredom. Radio-televizija Tuzlanskog kantona danas ima 100 uposlenih i višemilionski auditorij, vlastitu zgradu i prostor za rad, repetitore i odašiljače zemaljskog signala, koji pokriva cijelo područje sjeveroistočne Bosne, istočne Hrvatske i zapadne Srbije. Televizija Tuzlanskog kantona prisutna je u mrežama većine kablovskih operatera u BiH i susjednih zemalja. Kroz IPTV-servise dostupna je skoro u svim krajevima BiH. Program TVTK gleda se putem interneta i IPTV-servisa Bosna TV u Americi, Kanadi i zemljama Zapadne Evrope. Radio-televizija Tuzlanskog kantona danas proizvodi i emitira cjelodnevni radijski i televizijski program. Radna grupa i pored niza kontakata sa odgovornim osobama nije od Radio-televizije Tuzlanskog kantona dobila tražene podatke.

1.4. Radio-Televizija Bosansko-podrinjskog kantona Goražde kao zasebno preduzeće postoji od 16.9.2002.godine. Radio Goražde osnovano je 27. jula 1970., Televizija BPK formirana je 26.8.1996. godine. Navedeni podaci su preuzeti sa zvanične internet stranice. Radna grupa i pored niza kontakata sa odgovornim osobama nije od Radio-Televizije Bosansko-podrinjskog kantona dobila tražene podatke.

2. Postojeća medijska struktura na području Zeničko-dobojskog kantona

U Zeničko-dobojskom kantonu u većim općinama egzistiraju radio-televizijske stanice, kao što je u Zenici, Visokom, Maglaju, Kaknju i Tešnju, dok u svim općinama djeluje više radio stanica i kablovskih operatera.

S ciljem stvaranja objektivne slike o broju medija i medijskoj strukturi na području Zeničko-dobojskog kantona Radna grupa je medijskim kućama (radio-televizijskim stanicama) uputila upitnik sa zahtjevom za davanjem podataka o pravnom statusu medija i broju zaposlenih. Od 27 medijskih kuća na upitnik je odgovorilo 18. Na upit nije odgovorilo 9 medija koji, također, djeluju na području Kantona (NTV IC Kakanj, Produkcija MAGAZIN PLUS Visoko, RA TV Jelah, Kablovska SMART Televizija Tešanj, Kablovske TV Zavidovići, Kablovska TV Maglaj, Kablovska Marić Žepče, KTV E-G-E Matuzići Doboj-Jug i Telekabel Zenica-Telemach).

Iz tabele je vidljivo da je većina medija (radio-televizijskih stanica) privatizirana (RTV Maglaj; RTV Tešanj d.o.o.; NTV Amna Tešanj; Radiopostaja Žepče; Radio Zenit d.o.o. Zenica; Radio Breza d.o.o.; Radio 1503 Zavidovići d.o.o.; Radio Kakanj d.o.o.; Antena d.o.o. Tešanj- Jelah; Televizija "Vi-Net" d.o.o. Visoko; ZOS d.o.o. Doboj Jug), također je vidljivo da jedan broj medija nije privatiziran, odnosno da je jedan broj medija u mješovitom vlasništvu.

Najveći broj zaposlenih ima JP RTV Zenica-37, JP RTV Visoko 24, RTV Maglaj 11, Radio Žepče 10, RTV Q d.o.o. Visoko 8 itd.

	MEDIJ	PRAVNI STATUS	BROJ UPOSLENIH
1.	RTV Maglaj , Društvo za proizvodnju, prijenos i emitovanje d.o.o. Maglaj	100 % privatno vlasništvo	11
2.	JP RTV VISOKO d.o.o. Visoko	Javno preduzeće	24
3.	JP "RTV Zenica" d.o.o. Zenica	Mješ. vlasništvo Općina Zenica 67,52 %, sitni udjeličari 16,70%, RTV ZE 15,78 %	37
4.	RTV Tešanj d.o.o. Tešanj	privatizirana	3
5.	NTV Amna Tešanj	privatna televizija	4
6.	Radiopostaja Žepče	privatni (K projekt Žepče)	5
7.	RTV Q d.o.o. Visoko	neprivatizirana	8
8.	Radio Žepče	Javni radio JU "Dom kulture"	10
9.	Radio Zenit d.o.o Zenica	privatni	2 + vanjski saradnici
10.	Radio Breza d.o.o.	privatni	7
11.	Radio 1503 Zavidovići d.o.o.	privatni	3
12.	Radio Kakanj d.o.o. Kakanj	privatiziran	5 + 1 pripravnik

13.	Hrvatski radio Bobovac d.o.o.	nije privatiziran, kod RAK- a se vodi kao privatni	2
14.	ANTENA d.o.o. Tešanj- Jelah	privatni	5
15.	Televizija "Vi-Net" d.o.o. Visoko	privatna	3 (uskoro još dvoje)
16.	RADIO OLOVO	Javni	3
17.	JP Radio Usora d.o.o.	neprivatiziran	5
18.	ZOS d.o.o. društvo za rtv djelatnost export- import Doboj Jug	privatno vlasništvo	2

Uvidom u broj radio-televizijskih stanica se može utvrditi da sve općine na području Kantona imaju najmanje po jedan informativni medij. Broj i kvalitet medija koji djeluju na području Zeničko-dobojskog kantona predstavlja značajan medijski potencijal koji je osposobljen za kvalitetno informiranje građana u općinama na području Kantona. Ono što se može primjetiti kao nedostatak medijskog prostora je funkcionalna nepovezanost medija sa područja općina Kantona u horizontalnoj komunikaciji, te u nejednako informiranosti građana o dešavanjima na području cijelog Kantona.

3. Analiza pravnih propisa koji regulišu oblast javnog emitiranja

3.1. Zakon o javnom radiotelevizijskom sistemu Bosne i Hercegovine

Zakonom o javnom radiotelevizijskom sistemu Bosne i Hercegovine uređuju se Javni radiotelevizijski sistem u Bosni i Hercegovini i odnosi tri javna RTV servisa i zajedničkog pravnog subjekta unutar tog sistema, kao i njegova djelatnost i organizacija. U okviru Javnog radiotelevizijskog sistema u Bosni i Hercegovini realiziraju se principi i obaveze predviđeni ovim zakonom i drugim važećim zakonima u oblasti javnog emitiranja.

Sistem javnog emitiranja u Bosni i Hercegovini čine:

- a. *Radio-televizija Bosne i Hercegovine (BHRT) kao Javni RTV servis Bosne i Hercegovine,*
- b. *Radio-televizija Federacije Bosne i Hercegovine (RTFBiH) kao Javni RTV servis Federacije Bosne i Hercegovine,*
- c. *Radio-televizija Republike Srpske (RTRS) kao Javni RTV servis Republike Srpske,*
- d. *Korporacija javnih RTV servisa BiH.*

Javni RTV servis je fizičko ili pravno lice s uredničkom odgovornošću za pripremu usluge radio, televizijskog i multimedijalnog programa namijenjenog emitiranju za javnost ili proizvodnju i prijenos programa za treća lica u smislu ovog zakona. Javni RTV servisi imaju pravo prenositi program preko zemaljske mreže, satelita, kabela, interneta ili drugih tehničkih sredstava. Oni mogu pružati usluge teleteksta i uključiti se u svako novo polje odašiljačke tehnologije ili servisa u najširem smislu riječi. Javni RTV servisi samostalni su u obavljanju djelatnosti, imaju uređivačku nezavisnost i institucionalnu autonomiju.

Osnovni zadatak javnih RTV servisa jeste da plasmanom raznovrsnih i vjerodostojnih informacija istinito informiraju javnost o političkim, privrednim, socijalnim, zdravstvenim, kulturnim, obrazovnim, naučnim, religijskim, ekološkim, sportskim i drugim događajima, podstiču demokratske procese, osiguraju odgovarajuću zastupljenost nepristrasnih vijesti i programa o aktuelnim dešavanjima, u udarno i u drugo vrijeme, informativnog, kulturno-umjetničkog, obrazovnog, dječijeg, sportskog i zabavnog programa, te da programi najvišeg kvaliteta budu dostupni javnosti kako u BiH, tako i u FBiH i Republici Srpskoj.

Program javnih RTV servisa služi interesu javnosti i mora biti u skladu s profesionalnim standardima, propisima i pravilima Regulatorne agencije za komunikacije BiH, ako oni nisu u suprotnosti s ovim zakonom. Regulatorna agencija dodjeljuje frekvencije javnim RTV servisima. Javni RTV servisi rade na osnovu dozvole izdate od Regulatorne agencije u skladu sa odredbama Zakona o javnom radiotelevizijskom sistemu Bosne i Hercegovine i drugih odgovarajućih zakona.

Zakoni o BHRT, RTFBiH i RTRS su usklađeni s odredbama Zakona o javnom radiotelevizijskom sistemu Bosne i Hercegovine. Na pitanja koja nisu uređena ovim zakonima, a koja se tiču registracije, organizacije, poslovanja i djelatnosti javnih RTV servisa primjenjuju se važeći propisi o javnim preduzećima, privrednim društvima, registraciji poslovnih subjekata i drugi odgovarajući propisi, ukoliko nisu u suprotnosti sa ovim zakonima ili Zakonom o javnom radiotelevizijskom sistemu Bosne i Hercegovine.

Zakonom o komunikacijama („Službeni glasnik BiH“, broj 31/03, 75/06 i 32/10) se regulira oblast komunikacija u Bosni i Hercegovini i uspostava i rad Regulatorne agencije za komunikacije Bosne i Hercegovine u skladu sa Ustavom Bosne i Hercegovine, koji predviđa uspostavu i funkcioniranje zajedničkih i međunarodnih komunikacijskih sredstava. Komunikacije uključuju telekomunikacije, radio, emitiranje (uključujući kablovsku televiziju) i usluge i sredstva koja su stim u vezi. Zakonom o komunikacijama BiH propisani su između ostalog principi emitiranja programa, kao i nadležnosti Regulatorne agencije za komunikacije Bosne i Hercegovine.

3.2. Oblast javnog emitiranja u nadležnosti kantona

Kantonalnim propisima regulisano je obavljanje djelatnosti javnog informisanja u cilju ostvarivanja prava na informisanje i zadovoljavanje kulturnih, obrazovnih i drugih potreba naroda i građana u četiri kantona na području Federacije BiH, putem javnih preduzeća, i to:

Javno preduzeće Radio-televizija Tuzlanskog kantona d.o.o. Tuzla (Zakon o radio-televiziji Tuzlanskog kantona), Javno preduzeće „Televizija Kantona Sarajevo“ d.o.o. Sarajevo (Odluka o osnivanju), Javno preduzeće „Radio-televizija Unsko-sanskog kantona“ d.o.o. Bihać (Odluka o osnivanju), Javno preduzeće Radio-televizija Bosansko-podrinjskog kantona Goražde, d.o.o. (Zakon o radio-televiziji Bosansko-podrinjskog kantona Goražde). Osnivačka prava prema navedenim preduzećima vrše skupštine kantona.

Na pitanja koja nisu regulisana odredbama navedenih propisa, shodno se primjenjuju odredbe Zakona o javnim preduzećima u Federaciji BiH, Zakona o privrednim društvima, Zakona o ravnopravnosti spolova u BiH i Odluke o standardnoj klasifikaciji djelatnosti u Federaciji BiH. Navedene kantonalne radio-televizije imaju dozvole za emitovanje programa na frekvencijama koje je odobrila Regulatorna agencija za komunikacije Bosne i Hercegovine. Program preduzeća uređuje se i proizvodi u skladu sa Zakonom o komunikacijama BiH i propisima Regulatorne agencije za komunikacije Bosne i Hercegovine

uz poštovanje profesionalnih standarda, novinarske etike i drugih uobičajenih pravila i kriterija profesije.

3.3. Zeničko-dobojski kanton

Ustavom Zeničko-dobojskog kantona („Službene novine Federacije BiH“, broj 7/96 i „Službene novine Zeničko-dobojskog kantona“, broj 1/96, 10/00, 8/04 i 10/04) utvrđeno je da je Kanton nadležan za utvrđivanje politike u vezi sa osiguranjem radija i televizije, uključujući donošenje propisa o osiguranju njihovog rada i izgradnji, te da Skupština Kantona donosi zakone i ostale propise za izvršavanje kantonalnih nadležnosti.

Na području Zeničko-dobojskog kantona u primjeni je *Zakon o javnom informisanju* („Službene novine Zeničko-dobojskog kantona“, broj 13/98). Zakonom o javnom informisanju je propisano između ostalog šta je sloboda informisanja, šta su javna glasila, ko i kako se može osnovati javno glasilo (između ostalog programi radija i televizije-radiodifuzija), te vođenje evidencije javnih glasila Kantona. Ovim Zakonom nisu regulisani uslovi i način obavljanja djelatnosti javnog informisanja.

Kada je u pitanju osnivanje Javnog servisa Kantonalna radio-televizija na području Zeničko-dobojskog kantona, imajući u vidu ustavnu nadležnost, te odredbe navedenog zakona, Skupština Kantona može donijeti propis kojim bi se regulisao rad i djelatnost Radio-televizije Zeničko-dobojskog kantona radi obavljanja djelatnosti javnog informisanja s ciljem ostvarivanja prava konstitutivnih naroda zajedno sa ostalim kao i prava građana Zeničko-dobojskog kantona na informisanje, kao i zadovoljavanje njihovih kulturnih, obrazovnih i drugih potreba. Na osnovu donesenog propisa (osnivački akt), Radio-televizija Zeničko-dobojskog kantona upisuje se kao javno preduzeće u sudski registar kod nadležnog suda u sjedištu.

Propis o osnivanju Javnog preduzeća Radio-televizija Zeničko-dobojskog kantona d.o.o., ukoliko se bude donosio, mora biti usklađen sa Zakonom o javnim preduzećima u Federaciji BiH, Zakonom o privrednim društvima i drugim važećim propisima. Takođe je potrebno napomenuti da, u slučaju osnivanja, Javno preduzeće Radio-televizija Zeničko-dobojskog kantona d.o.o. mora imati dozvolu za emitovanje programa na frekvencijama koje odobrava Regulatorna agencija za komunikacije BiH shodno odredbama Zakona o komunikacijama BiH, bez koje ne mogu raditi. Tražene-dodijeljene frekvencije moraju biti dovoljne da bi se osiguralo da što veći broj stanovnika u Kantonu može imati nesmetan prijem programa kantonalne radio-televizije, u mjeri u kojoj je to praktično izvodljivo.

3.4. Odgovor Regulatorne agencije za komunikacije BiH

Radna grupa za izradu ove informacije se dopisom obratila *Regulatornoj agenciji za komunikacije BiH* s molbom da u okviru svojih ovlaštenja iz Zakona o komunikacijama BiH („Službeni glasnik BiH“, broj 31/03) odgovori na slijedeća pitanja: da li će se moći aplicirati za dodjelu dugoročne dozvole za emitiranje?; da li će se moći aplicirati za dodatne frekvencije na području ZDK-a?;

Regulatorna agencija za komunikacije je u svom odgovoru Radnoj grupi, a u vezi sa upitom za dodjelu novih ili dodatnih frekvencija postojećim korisnicima dozvola, navela da Agencija raspoložive frekventne resurse dodjeljuje isključivo putem javnog poziva, na način i pod uslovima kako je to definisano RAK Pravilom 55/2011 o pružanju audiovizuelnih

medijskih usluga („Službeni glasnik BiH“, broj: 98/11). U odgovoru Agencije se navodi da s obzirom da je Bosna i Hercegovina u procesu planiranja prelaska sa analogne na digitalnu zemaljsku radiodifuziju, raspisivanje narednog javnog poziva se ne očekuje dok se taj proces ne okonča.

Agencija je dostavila stav i o mogućnosti uspostave TV kanala koji bi se eventualno emitovao putem elektronskih komunikacija (kabl, satelit, IPTV, internet...). U dopisu Agencije se navodi da u skladu sa Pravilom 55/2011 o pružanju audiovizuelnih medijskih usluga, Agencija izdaje Dozvolu za televizijsko emitovanje koje se vrši putem elektronskih komunikacijskih mreža (kabl, satelit, IPTV, internet...), izuzimajući zemaljsko emitovanje. Zahtjev za dodjelu dozvole za televizijsko emitovanje koje se vrši putem drugih elektronskih komunikacijskih mreža mogu podnijeti sva fizička i pravna lica sa sjedištem u Bosni i Hercegovini koja su, u skladu sa zakonom, registrovana za odgovarajuće djelatnosti na osnovu važeće klasifikacije djelatnosti u Bosni i Hercegovini, a koja su do dana podnošenja zahtjeva izmirila sve dospjele finansijske obaveze prema Agenciji nastale po bilo kom osnovu. Emitovanje programa u skladu sa navedenom dozvolom otvara mogućnost programsko-tehničke saradnje sa postojećim televizijskim stanicama, u smislu zajedničke proizvodnje/koprodukcije, razmjene ili reemitovanja programskih sadržaja.

4. Mogući koncepti formiranja Javnog servisa kantonalna radio-televizija

Radna grupa za izradu Informacije je analiziravši pravne mogućnosti formiranja Javnog servisa utvrdila četiri moguća koncepta/modela formiranja Javnog servisa Kantonalna radio-televizija: prvi model - formiranje novog, samostalnog i posebnog pravnog lica - Javnog servisa (kupovina opreme, izgradnja zgrade, zapošljavanje potrebnog kadra itd.); drugi model - formiranje Javnog servisa kao pravnog lica - putem integracije postojećih općinskih rtv stanica (općinske stanice gube svojstvo pravnog lica); treći model - transformacija RTV Zenica u Kantonalnu radio-televiziju i četvrti model - djelimične stručno-tehničke integracije postojećih rtv sistema u kantonalni informativni sistem, uz zadržavanje pravnog subjektiviteta članica.

Radni tim je izvršio anketiranje radio-televizijskih stanica u pogledu njihovog preferiranja navedenih modela. Upitnik je dostavljen 27 radio-televizijskih stanica, a odgovore je dostavilo 11 („Radio 1503 Zavidovići d.o.o.“; „RTV Zenica“; „Hrvatski radio Bobovac“; „Radio Olovo“; „Radio postaja Žepče“; „Radio Žepče“; „JP Radio Usora“; „Q Radio Visoko“; „Televizija Vi-Net“ Visoko; „Antena – Jelah“; „Radio Breza“).

4.1. Formiranje novog, samostalnog i posebnog pravnog lica - Javnog servisa (kupovina opreme, izgradnja zgrade, zapošljavanje potrebnog kadra itd.)

Na pitanje upućeno radio-televizijskim stanicama na području Kantona koji od četiri modela/koncepta formiranja Javnog servisa preferiraju - samo je RTV Zenica (uz model transformacije RTV Zenica u Kantonalnu radio-televiziju) - odabrala model formiranje novog, samostalnog pravnog lica Javnog servisa.

Ovaj model posmatran iz perspektive postojećih budžetskih mogućnosti Zeničko-dobojskog kantona nije realan, jer pretpostavlja značajna izdvajanja za izgradnju zgrade, kupovinu opreme, te tekuća izdvajanja za zaposlene i proizvodnju programa.

Poteškoća kod ovog modela je i to što Regulatorna agencija za komunikacije raspoložive frekventne resurse dodjeljuje isključivo putem javnog poziva. Naime, kao što smo već naznačili s obzirom da je Bosna i Hercegovina u procesu planiranja prelaska sa analogne na digitalnu zemaljsku radiodifuziju, raspisivanje narednog javnog poziva se ne očekuje dok se taj proces ne okonča.

4.2. Formiranje Javnog servisa kao pravnog lica - putem integracije postojećih općinskih rtv stanica (općinske stanice gube svojstvo pravnog lica)

Anketiranje radio-televizijskih stanicama na području Kantona je pokazalo da nijedna radio-televizijska stanica ne smatra relevantnim model formiranja Javnog servisa kao pravnog lica - putem integracije postojećih općinskih rtv stanica, gdje općinske stanice gube svojstvo pravnog lica.

Teško je napraviti objektivnu procjenu koliko bi finansijskih sredstava iziskivalo formiranje javnog servisa na osnovu ovog modela. Ukidanje pravnog subjektiviteta postojećih općinskih radio-televizijskih stanica pretpostavlja prenošenje osnivačkih prava na Kanton. Kao što smo vidjeli u tabeli gdje je prikazana struktura medija na području Kantona-značajan broj medija je privatiziran, što znači da bi bilo potrebno obezbjediti značajna sredstva za njihovu kupovinu.

4.3. Transformacija RTV Zenica u Kantonalnu radio-televiziju

Opciju formiranja Kantonalne radio-televizije putem transformacije RTV Zenica u Kantonalnu radio-televiziju je u upitniku od anketiranih radio-televizijskih stanica odabrala samo RTV Zenica. Navedeni stav RTV Zenica obrazlaže argumentom da je formiranje Javnog servisa kantonalna radio-televizija transformacijom RTV Zenica najrealnija opcija, te da koncepti integracije postojećih RTV stanica nemaju uporište iz tehničkih, pravnih, organizacijskih i profesionalnih razloga. Naglašavamo da druge radio-televizijske stanice nisu preferirale ovaj model formiranja Kantonalne radio-televizije.

Prema dostavljenim opštim i finansijskim podacima od RTV Zenica o trenutnom stanju kao i okvirnim procjenama potrebnih kadrovskih i materijalnih ulaganja za početak rada Kantonalnog javnog radio-televizijskog servisa, po ovom konceptu značajno je istaći:

1. Radio – televizija Zenica ima status javnog preduzeća koje je formirano Odlukom Vijeća Općine Zenica od 23. maja 1995. godine. Trenutno je zaposleno 37 zaposlenika a vrijednost stalnih sredstava je 1.084.685 KM od čega je vrijednost

a) zemljišta	22.284 KM
b) građevinskih objekata	801.232 KM
c) opreme	174.638 KM
d) ostalih stalnih sredstava	85.931 KM

Po godišnjem obračunu za 2011. godinu stanje gotovine je iznosilo 35.638 KM, potraživanja 100.894 KM a plativih obaveza 197.322 KM i to kratkoročnih tekućih obaveza 168.250 KM i obaveza po osnovu dugoročnih kredita 29.072 KM.

Ukupni prihodi su iznosili 884.289 KM sa slijedećom strukturom:

a) od tekućih grantova	320.000 KM
------------------------	------------

b) od sopstvene djelatnosti	451.473 KM
c) ostali prihodi	112.816 KM

Ukupnih 880.604 KM rashoda se odnosi na:

a) plaće i ostala primanja zaposlenih	636.191 KM
b) materijalne troškove i usluge	82.414 KM
c) ostale rashode	161.999 KM

Prema mišljenju RTV Zenica potrebna kadrovska i materijalna ulaganja za početak rada Kantonalnog javnog servisa ne mogu se praviti bez detaljne analize i definisanih ciljeva o načinu osnivanja i funkcionisanja kantonalne RTV, obimu programa, načinu pokrivanja signalom i potrebnoj tehničkoj i drugoj opremi.

Okvirno, za transformaciju RTV Zenica u Kantonalnu radio – televiziju procjenjuju da je potrebno minimalno ulaganje:

- za dodatni broj zaposlenika (20 zaposlenika) i troškove plaća godišnje 400.000 KM
- ulaganja u opremu 300.000 KM
- ulaganja u građevinske objekte nisu kvantificirana ali je konstatovano da sadašnji prostor za rad nije adekvatan te da je potreban prostor za rad kantonalne RTV (studijski, tehnički, redakcijski i dr.) te da postoji projekat za izgradnju istog.

U prethodnim sazivima Vlade Zeničko-dobojskog kantona bila je prisutna inicijativa o mogućoj transformaciji „RTV Zenica“ u Kantonalnu RTV. U tu svrhu je Vlada Zeničko-dobojskog kantona (period 2001-2002. godine) iz Budžeta Zeničko-dobojskog kantona izdvojila 150.000,00 KM za nabavku opreme za RTV Zenica, kao pomoć u prvoj fazi formiranja Kantonalne radio-televizije.

U situaciji kada bi se Vlada Zeničko-dobojskog kantona odlučila, pa i pravno regulirala preuzimanje frekvencije od postojećeg Javnog preduzeća „Radio- televizija Zenica“ d.o.o. Zenica, koja od 1969. godine (Radio) i 1995. godine (Televizija) egzistira u Zenici, kao gradu sjedištu Zeničko-dobojskog kantona, i uvažavajući činjenicu da su već izdvojena finansijska sredstva, ne treba zanemariti potrebu za obezbjeđivanjem novih smještajnih kapaciteta i što je još važnije upošljavanje stručnog kadra koji bi trebao zadovoljavati teritorijalnu zastupljenost svih općina na području Zeničko-dobojskog kantona.

Procjena RTV Zenica za ukupno potrebnim godišnjim sredstvima za tekuće poslovanje transformisane televizije u javni Kantonalni radio - televizijski servis je cca 1.500.000 KM.

4.4. Koncept djelimične stručno-tehničke integracije postojećih rtv sistema u kantonalni informativni sistem, uz zadržavanje pravnog subjektiviteta članica

Osim RTV Zenica sve radio-stanice koje su odgovorile na upitnik radne grupe zastupaju model djelimične stručno-tehničke integracije postojećih rtv sistema u kantonalni informativni sistem, uz zadržavanje pravnog subjektiviteta članica.

U dopisima većine radio-televizijskih stanica se navodi da koncept djelimične stručno-tehničke integracije postojećih rtv sistema u kantonalni informativni sistem preferiraju isključivo u slijedećim uslovima:

- a) da postojeće privatne i državne radio i tv stanice zadrže svoj dosadašnji pravni status, pravnu samostalnost i subjektivitet,
- b) da se integracija realizuje kroz udruženje medija (forma udruženja građana), a nikako kroz novoregistrovano preduzeće tipa d.o.o. , d.d. ili JP,
- c) da svaki radio ili televizija zadrži programsku samostalnost i uredničku slobodu, kako u informativnom, tako i u ostalim segmentima programa,
- d) da se svakom radiju ili televiziji omogući da svom slušateljstvu/gledateljstvu plasira informacije iz bilo kojeg dijela Zeničko-dobojskog kantona, a dostupne putem stručno – integriranih radija i televizija kroz udruženje medija,
- e) da se svakom radiju ili televiziji omogući da značajne i interesantne informacije iz svoje sredine plasira stanovništvu na prostoru cijelog Zeničko-dobojskog kantona putem stručno – integriranih radija i televizija kroz udruženje medija,
- f) da ovaj koncept stručno – tehničke integracije ne podrazumijeva preferiranje bilo kojeg medija u odnosu na ostale u finansijskom, materijalnom, tehničkom, kadrovskom ili drugačijem obliku (mislimo na opasnost da neki od radija ili televizija bude određen kao „nosilac projekta“ što po pravilu uvijek donosi štetu ostalim medijima),
- g) da cilj djelimične stručno – tehničke integracije bude potpunije, sveobuhvatnije, raznovrsnije i tačnije informisanje stanovništva Zeničko-dobojskog kantona,
- h) da ovaj projekt nema skrivenih namjera koje za cilj imaju budžetskim sredstvima finansirati jedan medij ili mali broj odabranih medija u Zeničko-dobojskom kantonu,
- i) da stručna komisija koja se bavi medijima u svom sastavu ima 2-3 predstavnika iz Udruženja radiostanica Zeničko-dobojskog kantona: jer je ovo Udruženje prije godinu dana dalo Vladi Kantona niz konstruktivnih prijedloga oko informativno-programsko-tehničkog uvezivanja radiostanica na cijelom prostoru Zeničko-dobojskog kantona; jer je Udruženje najbrojnije medijsko udruženje u Zeničko-dobojskom kantonu i jer će to sigurno doprinijeti transparentnijem i stručnijem radu ove komisije.

Ovaj koncept, ističu predstavnici većine anketiranih medija, uz ispunjenje prethodnih uslova, bi omogućio: potpunije, sveobuhvatnije, raznovrsnije i tačnije informisanje stanovništva Zeničko-dobojskog kantona; optimalno iskorištenje već postojećih tehničkih i kadrovskih kapaciteta svih medija u Kantonu; minimalna ulaganja, maksimalan efekt; doprinos svih medija ispunjenju cilja; eliminisanje potencijalne diskriminacije prema nekim medijima ili favorizovanja nekih medija; poštenu i uspješnu realizaciju projekta.

5. Osnove programa i djelatnost Javnog servisa Kantonalna radio-televizija

Osnovna komponenta funkcioniranja Javnog servisa Kantonalna radio-televizija je kreiranje vlastitog programa, odnosno sadržaja iz vlastite produkcije. Model programa zavisi od ljudskog i tehničkog potencijala, načina koncipiranja menadžmenta, ali i stvaranja mogućnosti za reprodukciju atraktivnih sadržaja (informativnih, filmskih, revijalnih, muzičkih

sportskih...). Kreiranje programa bit će uslovljeno zadovoljavanjem potreba građana Zeničko-dobojskog kantona, adekvatne zastupljenosti svih općina sa područja kantona.

Program Javnog servisa Kantonalna radio-televizija bio bi koncipiran na već ustaljenim i standardizovanim diferencijama sadržaja za javne servise. U tom smislu, kvantitativni omjer programskih sadržaja bi bio: 60% programa koji sačinjavaju informativni, obrazovni i kulturni sadržaj, te 40% zabavno-muzički i sportski sadržaj. Postojali bi slijedeći sadržajni segmenti:

- a) informativno-politički (sve relevantne i aktuelne informacije iz političkog života Kantona i općina, ali i iz BiH i svijeta). U ovaj segment ubrajamo privrednu i ekonomsku tematiku, kao i odnose s javnošću,
- b) kulturno-edukativni (proizvodio bi se program kojim se uspostavlja kulturni model koji: potiče formiranje pozitivnih kulturnih i društvenih vrijednosti; potiče afirmaciju, zaštitu graditeljskog naslijeđa; afirmira i tradicionalne i savremene kulturne vrijednosti; afirmira kako kulturnu različitost, tako i kulturno zajedništvo; afirmira kulturnu saradnju i dijalog na svim nivoima; potiče povezivanje institucionalne i manifestacijske kulture).
- c) zabavno-rekreativni (ovaj set programa sadrži serijske, filmske, muzičke, sportske i druge slične sadržaje).
- d) servisno-uslužni (blok informacija kojim bi se pružile informacije sa visokom upotrebom vrijednošću, te ostvarile uspješnije „public relations“ pojedinih privrednih i drugih subjekata sa auditorijem).

U ostvarivanju programa Javni servis Kantonalna radio-televizija će posebno: afirmirati vrijednost BH društva; informirati javnost o političkim, privrednim, zdravstvenim, kulturnim, obrazovnim, naučnim, religijskim, ekološkim, sportskim i drugim događajima i pojavama u Kantonu, zemlji i inostranstvu, te osigurati otvorenu i slobodnu raspravu o svim pitanjima od javnog interesa; doprinositi poštivanju osnovnih ljudskih prava i sloboda, demokratskih vrijednosti, te unaprijeđenju javnog dijaloga; poštovati privatnost, dostojanstvo građana u skladu sa profesionalnim standardima, etičkim kodeksom i pravilima struke.

Djelatnost Javnog servisa će se ispoljavati kroz: pripremanje, proizvodnju, reprodukciju, difuziju i prijenos vlastitih radio i televizijskih programa namijenjenih javnosti u Kantonu, Federaciji Bosne i Hercegovine, Bosni i Hercegovini i svijetu; difuziju radio i televizijskih programa drugih radio i televizijskih stanica, te drugih proizvođača programa u zemlji i svijetu za javnost u Kantonu, Federaciji Bosne i Hercegovine i Bosni i Hercegovini; učesće u zajedničkim programima radio i televizijskih stanica u Kantonu, Federaciji Bosne i Hercegovine, Bosni i Hercegovini i svijetu; razmjenu radio i televizijskih programa sa drugim radiodifuznim organizacijama u Kantonu, Federaciji Bosne i Hercegovine, Bosni i Hercegovini i svijetu; održavanje i razvoj vlastite tehničke osnovne i prijenosne mreže za ostvarivanje programske djelatnosti; arhiviranje fonografskih i videografskih zapisa; ustupanje uz ugovorenu naknadu marketinškog prostora u okviru RTV programa, ili nakon završetka emitiranja programa za određeni dan; proizvodnju i prodaju audio i video zapisa; organizaciju, samostalno ili u saradnji sa drugim subjektima, različitih manifestacija u cilju proizvodnje programa.

Z a k l j u č c i

Nakon analize finansijskih, pravnih, kadrovskih, stručno-tehničkih faktora bitnih za formiranje Javnog servisa Kantonalna radio-televizija možemo zaključiti:

Društvena opravdanost

- U četiri kantona na području Federacije BiH, djeluju kantonalne televizije: Javno preduzeće Radio-televizija Tuzlanskog kantona, Javno preduzeće „Televizija Kantona Sarajevo“, Javno preduzeće „Radio-televizija Unsko-sanskog kantona“, Javno preduzeće Radio-televizija Bosansko-podrinjskog kantona.
- Uvidom u broj radio-televizijskih stanica na području Zeničko-dobojskog kantona se može utvrditi da sve općine na području Kantona imaju najmanje po jedan informativni medij. Broj i kvalitet medija koji djeluju na području Kantona predstavlja značajan medijski potencijal koji je osposobljen za kvalitetno informiranje građana u općinama na području Kantona. Ono što se može identificirati kao nedostatak medijskog prostora je funkcionalna nepovezanost medija sa područja općina Kantona u horizontalnoj komunikaciji, te u nejednako informiranosti građana o dešavanjima na području cijelog Kantona.
- Za osnivanjem Javnog servisa Kantonalna radio-televizija postoji objektivna društvena potreba, odnosno formiranjem Javnog servisa bi se ostvarilo pravo građana Zeničko-dobojskog kantona na informisanje. Javni servis bi povećao stepen informiranosti javnosti o političkim, privrednim, zdravstvenim, kulturnim, obrazovnim, naučnim, religijskim, ekološkim, sportskim i drugim događajima na području Zeničko-dobojskog kantona.
- Razlozi za formiranjem Javnog servisa Kantonalna radio-televizija proizilaze i iz potrebe za kontinuiranim informisanjem građana o radu kantonalnih ustanova i institucija. Javni servis bi nepristrasno informisao građane o događajima i pojavama od javnog interesa u općinama, Kantonu, zemlji i inostranstvu. Djelovanje Javnog servisa bi se zasnivalo na poštivanju i podsticanju pluralizma političkih, religijskih i drugih ideja.
- Plasiranje-emitiranje informacija o događajima na cijelom području Kantona učvršćuje i jača identitet Zeničko-dobojskog kanton kao posebne i kompaktne administrativno-teritorijalne cjeline u sklopu FBiH i BiH.

Pravni aspekt

- Javni servis Kantonalna radio-televizija bi bio posebno pravno lice.
- Imajući u vidu ustavnu nadležnost, te odredbe Zakona o javnom informisanju („Službene novine Zeničko-dobojskog kantona”, broj 13/98), Skupština Zeničko-dobojskog kantona može donijeti propis kojim bi se regulisao rad i djelatnost Kantonalne radio-televizija radi obavljanja djelatnosti javnog informisanja s ciljem ostvarivanja prava konstitutivnih naroda zajedno sa ostalim kao i prava građana Zeničko-dobojskog kantona na informisanje, kao i zadovoljavanje njihovih kulturnih, obrazovnih i drugih potreba.

Tehnički aspekt

- U slučaju osnivanja, Javni servis Kantonalna radio-televizija Zeničko-dobojskog kantona mora imati dozvolu za emitovanje programa na frekvencijama koje odobrava Regulatorna agencija za komunikacije BiH shodno odredbama Zakona o komunikacijama BiH. Tražene-dodijeljene frekvencije moraju biti dovoljne da bi se osiguralo da što veći broj stanovnika u Kantonu može imati nesmetan prijem programa Kantonalne radio-televizije, u mjeri u kojoj je to praktično izvodljivo.
- Regulatorna agencija za komunikacije raspoložive frekventne resurse dodjeljuje isključivo putem javnog poziva, na način i pod uslovima kako je to definisano Zakonom o pružanju audiovizuelnih medijskih usluga („Službeni glasnik BiH“, broj: 98/11). S obzirom da je Bosna i Hercegovina u procesu planiranja prelaska sa analogne na digitalnu zemaljsku radiodifuziju, raspisivanje narednog javnog poziva se ne očekuje dok se taj proces ne okonča.
- Mogućnost uspostave TV kanala koji bi se eventualno emitovao putem elektronskih komunikacija (kabl, satelit, IPTV, internet...): Regulatorna agencija za komunikacije BiH u skladu sa Pravilom 55/2011 o pružanju audiovizuelnih medijskih usluga, izdaje Dozvolu za televizijsko emitovanje koje se vrši putem elektronskih komunikacijskih mreža (kabl, satelit, IPTV, internet...), izuzimajući zemaljsko emitovanje. Zahtjev za dodjelu dozvole za televizijsko emitovanje koje se vrši putem drugih elektronskih komunikacijskih mreža mogu podnijeti sva fizička i pravna lica sa sjedištem u Bosni i Hercegovini koja su, u skladu sa zakonom, registrovana za odogovarajuće djelatnosti na osnovu važeće klasifikacije djelatnosti u Bosni i Hercegovini, a koja su do dana podnošenja zahtjeva izmirila sve dospjele finansijske obaveze prema Agenciji nastale po bilo kom osnovu. Emitovanje programa u skladu sa navedenom dozvolom otvara mogućnost programsko-tehničke saradnje sa postojećim televizijskim stanicama, u smislu zajedničke proizvodnje/koprodukcije, razmjene ili reemitovanja programskih sadržaja.

Mogući koncepti formiranja Javnog servisa kantonalna radio-televizija

- Četiri su moguća koncepta/modela formiranja Javnog servisa kantonalna radio-televizija: prvi model - formiranje novog, samostalnog i posebnog pravnog lica - Javnog servisa (kupovina opreme, izgradnja zgrade, zapošljavanje potrebnog kadra itd.); drugi model - formiranje Javnog servisa kao pravnog lica - putem integracije postojećih općinskih rtv stanica (općinske stanice gube svojstvo pravnog lica); treći model - transformacija RTV Zenica u Kantonalnu radio-televiziju i četvrti model - djelimične stručno-tehničke integracije postojećih rtv sistema u kantonalni informativni sistem, uz zadržavanje pravnog subjektiviteta članica.

Finasijski aspekt

- Model formiranja novog, samostalnog i posebnog pravnog lica (Javnog servisa) bi podrazumijevao izdvajanje značajnih finansijskih sredstava za izgradnju zgrade, kupovinu opreme, te tekuća izdvajanja za zaposlene i proizvodnju programa. Iz Budžeta Kantona Sarajevo u 2012. godinu, TVSA

će biti doznačena subvencija u iznosu od 3.390.000,00 KM i grant za nabavku programa u iznosu od 400.000,00 KM.

- Model transformacije RTV Zenica u Kantonalnu radio-televiziju: okvirna procjena za ukupno potrebnim godišnjim sredstvima za tekuće poslovanje transformisane televizije u javni kantonalni radio - televizijski servis je cca 1.500.000 KM.

Rezime

Postoji objektivna društvena potreba za osnivanjem Javnog servisa Kantonalna radio-televizija. Javni servis Kantonalna radio-televizija bi djelovao kao posebno pravno lice iz razloga što se na ovaj način, osigurava objektivno i kontinuirano informisanje građana Kantona, vlastita produkcija, dosljedna programska orijentacija, odnosno sama svrha postojanja ovakvog javnog servisa na području Zeničko-dobojskog kantona.

Napominjemo da formiranje Kantonalne radio-televizije, na osnovu bilo kojeg od navedenih modela, iziskuje izdvajanje znatnih finansijskih sredstava, te stoga naglašavamo da bi najcjelishodniji model organizacionog ustroja javnog servisa Kantonalna radio-televizija obuhvatao slijedeće:

- a) Javni servis kao zasebno pravno lice;
- b) Emitovanje, odnosno distribucija programa bi se realizovala putem zakupajmljivanja zasebnih kanala u okviru postojećih kablovskih operatera u svim općinama na području Kantona, uz istovremeno emitovanje i putem Interneta, a što je u skladu sa Pravilom RAK-a 55/2011 o pružanju audiovizuelnih medijskih usluga. S obzirom da je Bosna i Hercegovina u procesu planiranja prelaska sa analogne na digitalnu zemaljsku radiodifuziju, Regulatorna agencija za komunikacije trenutno nije u mogućnosti dodjeliti frekvencije;
- c) Programska razmijena, kao i dopisnička mreža bi se realizovala putem posebnih ugovora sa postojećim RTV sistemima na području Kantona, a što je u skladu sa izraženim opredjeljenjima postojećeg menadžmenta u medijskim kućama, kao i namjerama osnivača kantonalnog servisa da osigura razmijenu i emitovanje najkvalitetnijih programskih sadržaja medijskih kuća od značaja i interesa za programsku politiku budućeg kantonalnog javnog servisa
- d) Predloženim tehničkim aspektom osigurala bi se kvalitetna distribucija proizvedenog i emitovanog programa, bez obzira na pretežno brdsko-planinski kraj i geografsku razuđenost područja općina našeg kantona, pri čemu je finasijsko-tehnički isplativ i model da se ulože sredstva u vlastite kablovske sisteme ili pak po osnovu javno-privatnog partnerstva sa kablovskim operaterima koji daju najbolju ponudu za one općine koje nemaju kablovsku mrežu.

Stoga smo mišljenja da bi se nakon konačnog opredeljenja Skupštine Kantona po ovoj informaciji, trebalo pristupiti izradi cjelovitog Elaborata koji će iskazati detaljne pokazatelje o tehničkim, kadrovskim, finansijskim i svim drugim relevantnim aspektima osnivanja javnog kantonalnog servisa.

Radna grupa za izradu Informacije